

YANGI O‘ZBEKISTON

Ijtimoiy-siyosiy gazeta

№ 38 (1099), 2024-yil 22-fevral, payshanba



www.yuz.uz



yuz.uznews



yuz_official



yuz.uz_news



yuz



O‘ZBEKISTON PREZIDENTI “KELAJAK O‘YINLARI”NING OCHILISH MAROSIMIDA ISHTIROK ETDI

O‘zbekiston Respublikasi Prezidenti Shavkat Mirziyoyev Rossiya Federatsiyasi Prezidenti Vladimir Putinning taklifiga binoan 21-fevral kuni “Kelajak o‘yinlari” musobaqasining tantanali ochilish marosimida ishtirok etish uchun amaliy tashrif bilan Qozon shahrida bo‘ldi.



Qozon shahriga amaliy tashrif doirasida O‘zbekiston Respublikasi Prezidenti Shavkat Mirziyoyev va Rossiya Federatsiyasi Prezidenti Vladimir Putinning uchrashuvi bo‘lib o‘tdi.

Suhbat avvalida davlatimiz rahbari Rossiya Prezidentini sportning an‘anaviy va virtual turlarini o‘zida mujassam etgan “Kelajak o‘yinlari” birinchi xalqaro musobaqasi o‘tkazilayotgani bilan samimiy qutladi.

Ikki tomonlama munosabatlarning dolzarb jihatlari, jumladan, o‘tgan yil 5-7-oktabr kunlari Moskva shahrida oliy darajada erishilgan kelishuvlarni amalga oshirish masalalari ko‘rib chiqildi.

Yetakchilar O‘zbekiston bilan Rossiya o‘rtasidagi keng qamrovli strategik sheriklik va itifoqchilik munosabatlari izchil mustahkamlanib borayotganini mamnuniyat bilan qayd etdilar.

2023-yilda bo‘lib o‘tgan Hukumatlararo komissiya yig‘ilishlari, hududlar, ta‘lim, tibbiyot forumlari, qator boshqa ishbilarmonlik va madaniyat tadbirlarining samarali natijalari yuksak baholandi.

Tovar ayirboshlashning ijobiy sur‘ati saqlanib qolmoqda. Sanoat, energetika, transport, kimyo, farmatsevtika va boshqa tarmoqlardagi loyihalar faol bosqichga kirgan.

Hududlar o‘rtasidagi kooperatsiya aloqalarini rag‘batlantirishga alohida e‘tibor qaratildi.

Toshkent va Jizzax viloyatlarida “Ximgrad” industrial texnoparklari muvafaqiyatli ishlayotgan. Buxoro va Navoiy viloyatlarida yangi “Alabuga” va “Master” innovatsiya parklari barpo etilmoqda.

Davlat rahbarlari transport yo‘laklarini birgalikda rivojlantirish, temir yo‘l transporti sohasidagi hamkorlikni mustahkamlash masalalarini muhokama qildilar.

Mintaqaviy kun tartibi yuzasidan ham fikr almashildi, bo‘lajak xalqaro tadbirlar rejasi ko‘rib chiqildi.

Shundan so‘ng O‘zbekiston Respublikasi Prezidenti Shavkat Mirziyoyev Qozon shahrida “Kelajak o‘yinlari” birinchi xalqaro multisport musobaqasining tantanali ochilish marosimida ishtirok etdi.

“Qozon Ekspo” xalqaro ko‘rgazmalar markazida bo‘lib o‘tgan tadbirda Rossiya Federatsiyasi Prezidenti Vladimir Putin, Belarus Prezidenti Aleksandr Lukashenko, Qozog‘iston Prezidenti Qosim-Jomart Toqayev, Qirg‘iziston Prezidenti Sadir Japarov, Tojikiston Prezidenti Emomali Rahmon va boshqa xorijiy mehmonlar ham qatnashdi.

Ishirokchilar e‘tiboriga “Kelajak o‘yinlari” dasturiga kirgan sport turlari haqida

videolavha va teatrlashtirilgan sahna ko‘rinishi taqdim etildi.

Davlatimiz rahbari ishtirokchilarga omad tilab, 2026-yilgi “Kelajak o‘yinlari”ni O‘zbekistonda o‘tkazishni taklif qildi.

Marosimdan so‘ng oliy martabali mehmonlar maxsus ko‘rgazma bilan tanishdilar. Virtual makondagi bellashuvlar va an‘anaviy sportni o‘zida mujassam etgan “fijital-sport” konsepsiyasi to‘g‘risida ma‘lumot berildi.

Yetakchilar kibersport musobaqalarini, fijital-futbol bo‘yicha mashg‘ulotlar jaryonini kuzatdilar, sportdagi yangi yo‘nalishning bugungi rivoji va istiqbollari haqida hikoya qiluvchi tasviriy san‘at namunalari va taqdimotlar bilan tanishdilar.

“Kelajak o‘yinlari” – bellashuvlar bir vaqtning o‘zida sportning an‘anaviy turlari va ularning raqamli muqobilari o‘tkaziladigan yuqori texnologik musobaqadir. U joriy yilning 21-fevral kunidan 3-mart kunigacha davom etadi.

Turnirda 100 dan ortiq mamlakatdan qariyb 300 ta jamoa, shu jumladan, O‘zbekiston vakillari ishtirok etmoqda. Yurtdoshlarimiz fijital-xokkey, virtual velopoyga, sport dasturlash kabi yo‘nalishlarda kuch sinashadi.

Shu bilan O‘zbekiston Respublikasi Prezidenti Shavkat Mirziyoyevning Qozon shahriga amaliy tashrifi yakunlandi.

O‘ZA



MILLIY STRATEGIK REJALASHTIRISH TIZIMI

huquqiy asoslarni takomillashtirish jamiyat va davlat manfaatlariga xizmat qiladi

Prezidentimizning keng jamoatchilik hukmiga havola qilingan “O‘zbekiston — 2030” strategiyasini “Yoshlar va biznesni qo‘llab-quvvatlash yili” da amalga oshirishga oid davlat dasturi to‘g‘risida”gi farmoni loyihasi belgilangan keng ko‘lamli vazifalarni joriy yilda samarali bajarish, xalqimizning kundalik hayotida ijobiy o‘zgarishlarga erishishga qaratilgan tizimli harakatlarni izchil davom ettirishga xizmat qilishi bilan ahamiyatlidir.

Xususan, unda “O‘zbekiston — 2030” strategiyasining 5 ta yo‘nalishi bo‘yicha 2024-yilda amalga oshiriladigan chora-tadbirlar va ishlab chiqilishi lozim bo‘lgan normativ-huquqiy hujjatlar ro‘yxati belgilangan.

Bu jarayonda ekspertlar, turli soha mutaxassislarining berayotgan takliflari muhim

ahamiyat kasb etadi. Shu bois, davlat dasturi loyihasida ko‘zda tutilayotgan chora-tadbirlar va ularning ijrosi, qonunchilikda kutilayotgan o‘zgarishlar borasida mutaxassislar fikri bilan qiziqdik.

► Davomi 3-betda

Munosabat

INDIVIDUAL IJTIMOIIY XIZMATLAR DASTURI

EHTIYOJMAND TOIFALAR AYNAN QANDAY YORDAMGA MUHTOJLIGI ANIQ BELGILANADI

Mamlakatimizda aholining ijtimoiy himoyasiga alohida e‘tibor qaratilib, ijtimoiy xizmat turlari va ko‘lami kengaytirilmoqda. 2023-yil 1-iyunda davlatimiz rahbarining “Aholiga sifatli ijtimoiy xizmat va yordam ko‘rsatish hamda uning samarali nazorat tizimini yo‘lga qo‘yish bo‘yicha kompleks chora-tadbirlar to‘g‘risida”gi farmoni qabul qilingan edi. Unga muvofiq, O‘zbekiston Respublikasi Prezidenti huzurida Ijtimoiy himoya milliy agentligi tashkil etildi.



Prezidentimiz raisligida 20-fevral kuni ijtimoiy himoya sohasidagi ustuvor vazifalar muhokamasi yuzasidan bo‘lib o‘tgan videoselektor yig‘ilishida ana shu yo‘nalishda amalga oshirilayotgan ishlar tahlil etilib, istiqbolli vazifalar belgilandi.

Tegishli agentlik, qo‘mita va mahalliy hokimliklar rahbarlarining shu xususdagi fikrlari bilan qiziqdik.

Mansurbek OLLOYOROV,
Ijtimoiy himoya milliy agentligi direktori:

— Adolatli ijtimoiy siyosat yuritish, aholining ehtiyojmand qatlamini muhofazalash mamlakatimizda amalga oshirilayotgan islohotlarning muhim yo‘nalishiga aylangan. Keyingi yillarda

bu borada keng qamrovli chora-tadbirlar amalga oshirilmoqda. Yangi tahrirdagi Konstitutsiyamizda O‘zbekiston ijtimoiy davlat ekani belgilandi. “O‘zbekiston — 2030” strategiyasida ham bu borada keng qamrovli vazifalar belgilangan va izchillik bilan amalga oshirilmoqda.

► Davomi 2-betda

O‘zbekiston va xalqaro maydon

Xorijdagi vatandoshlarimizdan ko‘p eshitamiz: hozir dunyoning ko‘plab davlatlari bozorida o‘zbek brendi ostidagi mahsulotlarni topish mumkin. Hatto okean orti mamlakatlarida ham “O‘zbekistonda ishlab chiqarilgan” degan yorliq ostidagi mahsulotlar do‘kon rastalarini bezab turibdi. Bu yurtimizda eksport uchun qulay muhit yaratilib, tadbirkorlarimiz an‘anaviy hamkor davlatlardan tashqari, yangi bozorlarga kirib borayotgani natijasi. Xususan, o‘tgan yili mamlakatimiz eksportining o‘shish sur‘ati 123,8 foizni tashkil etdi. Yurtimiz tashqi savdo aylanmasi hajmi qariyb 62,6 milliard dollarga yetib, shundan 24,4 milliard dollari eksport hissasiga to‘g‘ri keldi. Milliy mahsulotlarimiz jahonning 110 dan ortiq davlatiga kirib bormoqda.

EKSPORTGA YO‘L sifat nazoratidan boshlanadi

Albatta, bularning bari jozibador raqamlar. Ularga erishish oson bo‘lmaganini esa soha vakillari yaxshi biladi. Hamkorlik, kelishuv va boshqa ko‘plab iqtisodiy masalalardagi qiyinchiliklar bir tomon. Ammo eksportda yana bir muhim va zarur jihat bor, bu — mahsulot sifati. Ayniqsa, dunyoda xalqaro sifat va standart ko‘rsatkichlariga talab ortib borayotgan bugungi davrda ushbu mezon yanada qat‘iyilashmoqda. Ya‘ni tovarga yopishtirilgan sifat yorlig‘i uning xalqaro standartlar talablariga to‘la mos kelishini tasdiqlagan taqdirdagina, xorijdagi bozorlar rastalaridan joy oladi.

Xo‘sh, bu tizim mamlakatimizda qanchalik namunalil ishlayotgan? Afsuski, bu borada hamon ko‘zga tashlanayot-

gan kamchiliklar yo‘q emas. Joriy yilning 18-yanvar kuni davlatimiz rahbari raisligida investitsiya, eksport va sanoat sohasidagi ustuvor vazifalar muhokamasi yuzasidan o‘tkazilgan videoselektor yig‘ilishida ayni shu jihat ham tanqid qilindi. Ta‘kidlanganidek, O‘zbekiston “GSP+” tizimiga qo‘shilib, Yevropaga 6 ming 200 turdagi tovarlarni bojsiz olib kirish imkoniyatiga ega bo‘lsa-da, o‘tgan yili bu tizim doirasida bor-yo‘g‘i 384 turdagi tovarlar eksport qilindi. Meva-sabzavot eksporti uchun xorijiy davlatlarning fitosanitar ruxsatlari olinganiga qarab, bundan to‘liq foydalanilmagan.

► Davomi 4-betda

Uyg‘oq fikr

YOSH AVLOD VATANPARVARI YOKI ISTE‘MOLCHI?



5

